



REPUBLIKA E SHQIPËRISË

**KËSHILLI I LARTË GJYQËSOR**

Nr. \_\_\_\_\_ Prot.

Tiranë, më \_\_\_\_\_.\_\_\_\_.2024

**V E N D I M**

**Nr. 544, Datë 01.10.2024**

**PËR**

**KUALIFIKIMIN PËR EMËRIMIN NË SHËRBIMIN CIVIL GJYQËSOR TË ZNJ. {...},  
PËR POZICIONIN E NDIHMËSIT LIGJOR NË NJËSITË E SHËRBIMIT LIGJOR  
PRANË GJYKATAVE TË APELIT**

Këshilli i Lartë Gjyqësor, më datë 01.10.2024, pasi u njoh me materialet e çështjes dhe relacionin “Për kualifikimin dhe vijimin e procedurës së emërimit në shërbimin civil gjyqësor të znj. {...}, për pozicionin e ndihmësit ligjor në njësitë e shërbimit ligjor pranë gjykatave të apelit”, përgatitur nga relatori i çështjes z. Ridvan Hado, si dhe pasi shqyrtoi propozimin për kualifikimin e saj,

**V Ë R E N:**

**I. MBI FAKTET E PROCESIT TË KUALIFIKIMIT DHE VIJIMIT TË PROCEDURËS  
SË EMËRIMIT NË SHËRBIMIN CIVIL GJYQËSOR**

1. Këshilli i Lartë Gjyqësor (në vijim Këshilli) me vendimin nr. 157, datë 04.04.2023, konstatoi se znj. {...} plotësonte kriteret për të marrë pjesë në provimin e pranimit në Programin Fillestar në Shkollën e Magjistraturës, për vitin akademik 2023-2024, profili ndihmës ligjor. Ky verifikim u krye bazuar në nenet 34 pika 6, 53 pika 4, 55 dhe 56, të Ligjit nr. 98/2016 “Për organizimin e pushtetit gjyqësor në Republikën e Shqipërisë” (në vijim si “Ligji për Pushtetin Gjyqësor”).

2. Me vendimin nr. 473, datë 07.09.2023, mbështetur në nenin 53, të Ligjit “Për Pushtetin Gjyqësor”, si dhe në Vendimin e tij nr. 424/2020 “Për procedurën e verifikimit të kushteve dhe kritereve ligjore të rekrutimit të kandidatit për kancelar, për këshilltar ose për ndihmës ligjor”, Këshilli, ka filluar procedurën e verifikimit të kandidatëve fitues në provimin e pranimit në Programin e Formimit Fillestar pranë Shkollës së Magjistraturës, për ndihmës ligjor, viti akademik 2023 - 2024, duke caktuar relatorin për çdo procedurë verifikimi për secilin kandidat.

3. Në përfundim të procedurës së verifikimit të pasurisë dhe figurës për pozicionin e ndihmësit ligjor, Këshilli me vendimin nr. 323, datë 03.07.2024 ka vendosur kualifikimin e kandidatës fituese znj. {...} dhe lejimin e saj për ndjekjen e Programit të Formimit Fillestar të Shkollës së Magjistraturës, viti akademik 2023 – 2024, profili ndihmës ligjor.

4. Znj.{...} ka ndjekur programin e formimit fillestar për ndihmës ligjor viti akademik 2023-2027 në Shkollën e Magjistraturës. Në përfundim, me Vendimin nr. 29, datë 30.07.2024 “Për vlerësimin përfundimtar të kandidatëve për ndihmës ligjor në Programin e Formimit Fillestar”, Shkolla e Magjistraturës e rendit të tretën në listën e kandidatëve, me 80.18 pikë (*më shumë se 70% të pikëve në total*).

5. Në vijim të procedurës, Këshilli, për shkak të ndryshimit të përbërjes së Komisioneve të Përhershme, me vendimin e tij nr. 486, datë 13.09.2024 “Për një ndryshim në vendimin nr. 13, datë 18.01.2019 të KLGJ-së “Mbi ngritjen dhe përbërjen e komisioneve të përhershme”, në vijim me Vendimin nr. 539, datë 25.09.2024, ka vendosur :

*1. Caktimin e z. Ridvan Hado relator të procedurave të kualifikimit dhe vijimin e procedurave të emërimit në shërbimin civil gjyqësor të kandidatëve që kanë përfunduar programin e formimit fillestar për ndihmës ligjor në Shkollën e Magjistraturës, viti akademik 2023-2024, të papërfunduara nga relatori, znj. Gentiana Muçaj, si më poshtë:*

*... ii. znj. {...}*

6. Më datë 26.09.2024, në respektim të detyrimeve të përcaktuara në Vendimin e Këshillit 424/2020, znj.{...}, në rrugë elektronike, u njoftua: - për caktimin e relatorit të ri të kësaj procedure; - për të drejtën që kishte për të kërkuar përjashtimin e relatorit të caktuar dhe/ose të çdo anëtar tjetër të Këshillit, brenda 3 (tre) ditëve nga marrja e këtij njoftimi.

7. Po në rrugë elektronike, brenda afatit ligjor, kandidati parashtroi dakordësi dhe se nuk kishte ndonjë pretendim në lidhje me relatorin e ri të caktuar për procedurën e verifikimit/kualifikimit ndaj saj apo për ndonjë anëtar tjetër të Këshillit të Lartë Gjyqësor.

## II. VLERËSIME MBI VERIFIKIMIN E KUSHTIT FORMAL TË PRANIMIT NË SHËRBIMIN CIVIL GJYQËSOR

8. Për znj. {...} u verifikuan kriteret e përgjithshme për pranimin në shërbimin civil gjyqësor, të përcaktuar në nenin 55, pika 1, të Ligjit nr. 98/2016, kushte të cilat përcaktohen si kriteret e përgjithshme të pranimit në shërbimin civil edhe në nenin 21, të Ligjit nr. 152/2013, “Për nëpunësin civil”, i ndryshuar, si më poshtë:

*a) Të jetë shtetas shqiptar*

- Për këtë kriter, në dokumentin “Pasaportë”, lëshuar nga Ministria e Brendshme më datë 02.11.2018, pasqyrohet edhe përbërësi i gjendjes civile “shtetësia”, që në këtë rast pasqyrohet “shqiptare”. Nuk rezulton ndonjë e dhënë për lënien ose heqjen e shtetësisë shqiptare për subjektin pas këtij momenti;

*b) Të ketë zotësi të plotë për të vepruar*

- Për këtë kriter, nuk u gjet ndonjë e dhënë për heqjen apo kufizimin e saj me vendim gjyqësor të formës së prerë;

*c) Të zotërojë gjuhën shqipe, të shkruar dhe të folur*

- Zotërimi i gjuhës shqipe të folur dhe të shkruar prezumohet për çdo shtetas shqiptar që ka përfunduar arsimin e detyrueshëm;

*d) Të jetë në kushte shëndetësore që e lejojnë të kryejë detyrën përkatëse*

- Subjekti rezulton se është në kushte shëndetësore të cilat e lejojnë të kryejë detyrën pasi, sipas raportit mjeko-ligjor me nr. 704, datë 13.02.2023, lëshuar nga Qendra Shëndetësore nr.7, Tiranë, ka rezultuar “I aftë për punë” dhe nuk rezultojnë të dhëna të mëvonshme për cenimin e kësaj aftësie;

*e) Të mos jetë i dënuar me vendim të formës së prerë për kryerjen e një krimi apo për kryerjen e një kundërvajtjeje penale me dashje*

- Sipas informacionit të përpunuar nga Struktura e Posaçme pranë Këshillit<sup>1</sup>, referuar dokumentacionit të dërguar nga Drejtoria e Përgjithshme e Burgjeve, rezulton se znj. {...} nuk është e dënuar me vendim penal të formës së prerë. Gjithashtu, nga të dhënat e dosjes personale dhe tërësia e dokumentacionit të administruar gjatë procedurës së verifikimit, nuk rezultojnë të dhëna të mëvonshme që të cenojnë përmbushjen këtij kriteri;

---

<sup>1</sup> Shkresa nr. 4847 prot., datë 20.09.2023 e Strukturës së Posaçme për Regjistrimin, Administrimin dhe Përpunimin e Formularëve të Vetëdeklarimit pranë Këshillit të Lartë Gjyqësor.

*f) Ndaj tij të mos jetë marrë masa disiplinore e largimit nga shërbimi civil, që nuk është shuar sipas këtij ligji*

- Për këtë kriter, gjatë verifikimit, sipas vetëdeklarimit të bërë nga znj. {...} në jetëshkrimin (CV) e saj, në vërtetimin (Për Kontributet e Sigurimeve Shoqërore e Shëndetsore për Tatimpaguesin E-SIG 02/a, me nr. T07708283, datë 02.02.2023 dhe Vërtetim për Bazën e Vlerësuar, e datës 02.02.2023), në vërtetimin (Për Kontributet e Sigurimeve Shoqërore e Shëndetsore për Tatimpaguesin E-SIG 03/a, me nr. T07708063, datë 02.02.2023), të depozituar në dosjen e saj të aplikimit pranë Shkollës së Magjistraturës, u konstatua se ajo ka qenë e punësuar pranë disa zyrave avokatie si avokate që nga shkurt 2017 deri në maj 2021 dhe nga qershor 2021 dhe në vazhdim pranë Gjykatës Kushtetuese si specialiste e statistikave. Nga shkresa me nr. 55 prot., datë 08.02.2023 e Dhomës së Avokatisë së Shqipërisë dhe shkresa me nr. 143 prot., datë 02.02.2023 e Gjykatës Kushtetuese, të depozituara në dosjen e saj të aplikimit pranë Shkollës së Magjistraturës, rezulton se znj. {...} nuk ka detyrime financiare, si dhe në ngarkim të saj, nuk figurojnë masa apo procedime disiplinore në proces.

### **III. KONKLUZIONI**

9. Bazuar në rezultatet e parashtruara më lart, Këshilli i Lartë Gjyqësor vlerëson se në kushtet kur kandidatja përmbush kriteret e përgjithshme dhe të veçanta të pranimit për nëpunësit civil gjyqësor në kategorinë ndihmës ligjor; ka përfunduar me sukses Shkollën e Magjistraturës, e cila me vendimin e saj nr. 29, datë 30.07.2024, “Për vlerësimin përfundimtar të kandidatëve për ndihmës ligjor në Programin e Formimit Fillestar”, e ka renditur në listën e kandidatëve fitues, duke e klasifikuar të tretën me 80.18 pikë; është kualifikuar në procesin e verifikimit të kriterit të pasurisë dhe figurës, sipas vendimit të Këshillit të Lartë Gjyqësor nr. 323, datë 03.07.2024 “Për kualifikimin e kandidates fituese për në Programin e Formimit Fillestar të Shkollës së Magjistraturës, viti akademik 2023 – 2024, profili ndihmës ligjor, znj. {...}”, është vendi për kualifikimin e kandidates për emërimin në shërbimin civil gjyqësor, për pozicionin e ndihmësit ligjor në Njësinë e Shërbimit Ligjor pranë gjykatave të apelit.

### **PËR KËTO ARSYE**

Mbështetur në nenet 61, 90 pika 1, shkronja “h” dhe 97 pika 1, shkronja “a”, të Ligjit nr. 115/2016 “Për organet e qeverisjes të sistemit të drejtësisë”, i ndryshuar, në nenet 36, 42 dhe 59, të Ligjit nr. 98/2016 “Për organizimin e pushtetit gjyqësor në Republikën e Shqipërisë”, i ndryshuar, në Vendimin e tij nr. 424, datë 12.10.2020 “Për procedurën e verifikimit të kushteve dhe kriterëve ligjorë të rekrutimit të kandidatit për kancelar, për këshilltar ose për ndihmës ligjor”, si dhe në Vendimin e tij nr. 323, datë 03.07.2024 “Për kualifikimin e kandidates fituese për në Programin e Formimit Fillestar të Shkollës së Magjistraturës, viti akademik 2023 – 2024, profili ndihmës ligjor, znj. {...}”, Këshilli i Lartë Gjyqësor,

## **V E N D O S I :**

1. Kualifikimin për emërimin në shërbimin civil gjyqësor të znj. {...}, në pozicionin e ndihmësit ligjor në njësitë e shërbimit ligjor pranë gjykatave të apelit.
2. Një kopje e vendimit i njoftohet znj. {...}, sipas kërkesave të nenit 98 të Ligjit nr. 115/2016 “Për organet e qeverisjes së sistemit të drejtësisë”, i ndryshuar.

Ky vendim hyn në fuqi menjëherë dhe botohet në faqen zyrtare të internetit të Këshillit të Lartë Gjyqësor, pasi të redaktohet për sigurimin e anonimatit të subjekteve.

**PËR KËSHILLIN E LARTË GJYQËSOR**